

### የሃኒሲ ገፊዳ ኮይሮ ኪታ ጋሳ ቆፋ

ሃዋሪያ የሃኒሲ ገፊዳ ኮይሮ ኪታይ፣ ናምዑ አይፌ ቆፋታ አይኬስ። ሄሲካ ናባቤይሳቲ ሰሳራኔ ኢያ ናዓ ዩሱስ ኪሪስቶሳራ ኢሲፌቴላ ዳና ሜላ ሚንጮሳናሳኔ ሄ ኢሲፌቴላ ዳይሲያ ዎርዶ ቲሚርቲያፌ ሃካና ሜላ ኤንታ አኬኪሳናሳ። ሄ ዎዴ ዴንዲዳ ዎርዶ ቲሚርቲይ። «ሰሳይ ቤንቶና አያና አላሜ ሜዲስ። ሃ ቤንቲያ አላሚያኔ ኑ አሳቴላ ሰሳይ ሜዲያና ጊሾ ኢታ። ቃሲ ሃ ቤንቲያ አላሜይኔ ኑ አሳቴላይ ኑ አያና ቆሃናውኔ ቱኒሳናው ዳንዳዔና» ያጊዲ ታማርሶሶና። ሄሳ ጉሳይ፣ ኮይሮ፣ ዩሱሲ አሴ ጊዲዲ ዩቤና፣ ናምዓንሶ፣ ኢሲ አሲ ባ አያና ቱኒሶና ዴዲሼ ባ አሾን ናጋራ አሳናው ዳንዳዔስ ያጉሱ።

ሄሳ ጊሾ፣ የሃኒሲ ባ ኪታን፣ ዩሱሲ አሴ ጊዲዲ ዩዳይሳ ካዲያ አኒካ ሰሳ ናዓ ጊዴና (4:2-3)። ቃሲ ሰሳፌ ዩሌቲዳ አኒካ ኡባ ዎዴ ናጋራን ዴዔና (3:6) ያጊዲ ገፊስ።

ሄ ዎርዶ አስታማሬቲ፣ «አቶቴላ ጉሳይ፣ ሃ ሳዓ ዱሳስ ኡንዔቴላፌ ኬዩዲ ዩዳ ጊዲዲ ዴዎ» ያጎሶና። ሄሳ ቦላ ጉጂዲ፣ «ኢታኔ ሎዎ ቫኪዲ አይኬላ ጊዲን፣ ቃሲ ሃራ አሲ ሲቆ ጊዲን አቶቴላራ አይቢ ጋሄቴላካ ባዎ» ያጎሶና።

ገፊይ ሄ ቲሚርቲያ ኢዲዲ፣ «ዩሱስ ኪሪስቶሲ ፖሎ አሴ። ዩሱሳ አማኔይሳቲኔ ሰሳ ሲቆይሳቲ ኡባይ ባንታ ጊዶን ኢሶይ ኢሱዋራ ሲቆታናው ቤሴስ» ያጊዲ ኦዲስ።

1 የሃኒሳ ኪታ አይፌ ቆፋታ

ጌሎ ቆፋ 1:1-4

ፖሶኔ ዲማ 1:5-2:29

ሰሳ ናይታኔ ግላሄ ናይታ 3:1-24

ቱማኔ ዎርዶ 4:1-6

ሲቆ አሶ 4:7-21

ሶኒያ አማኖ 5:1-21

#### ዴዎ ኢሚያ ቃላ

1 ኑኒ ኮይሮፔ ዶሚዲ ዴዲያ፣ ኑ ሃይሳን ሲዲዳ፣ ኑ ጌሊዳ፣ አይፊያን ቤዲዳ፣ ኑ ኩሺያን ቦቺዳ ዴዎ ቃላባ ሂንቴው ገፊስ።

2 ሄ ዴያይ ቆንጫን፥ ኑኒ ኢያ ቤዒዲ፥ ኢያባ ማርካቶስ። አዋ ማታን ዴዒያ ኑስ ቆንጫዳ፥ ሜሪና ዴዑዋባ ሂንቴው አዋጀስ።  
 3 ኑራ ሂንቴው ኢሲፌቴላ ዳና ሜላ ኑኒ ቤዒዳይሳኔ ሲዒዳይሳ ሂንቴው አዶስ። ሂንቴው ኑራ ኢሲፌቴላ ዴዒያ ጊሾ አዋራኔ ኢያ ናሃ ዮሱስ ኪሪስቶሳራ ኢሲፌቴላ ዴዔስ። 4 ኑ ኡፋይሳይ ፖሎ ጊዳና ሜላ ሄሳ ሂንቴው ሃፎስ።

**የሳይ ፖያ**

5 ኑኒ ዴያ ጊዲዳ ኢያፕ ሲዒዲ፥ ሂንቴው አዲያ ኪታይ ሃይሳ፡ «የሳይ ፖያ፤ ኢያን ጳጢያ ባዋ» ያጌይሳ። 6 ኑስ ኢያራ ኢሲፌቴላ ዴዔስ ያጊሼ ጳጢያን ዴዒኮ፥ ኑ አዳኒኔ ኑ አሱዋን ዎርዶቶስ። 7 ሺን ፖያን ኢ ዴዔይሳዳ፥ ኑካ ፖያን ዴዒኮ፥ ኑስ ዎሊ ጊዶን ኢሲፌቴላ ዴዔስ። ኢያ ናሃ፥ ዮሱሳ ሱሳይ ናጋራ ኡባፌ ኑና ጌሼስ።

8 ኑኒ፥ ኑናን ናጋሪ ባዋ ጊኮ ኑ ኑና ጫዎስ፤ ኑናን ቱሚ ባዋ።  
 9 ሺን ያሳስ ኑ ናጋራ ፓዲኮ፥ ኢ ኑ ናጋራ አቶ ጋናዉኔ ኑ ቆሆ አሶ ኡባፌ ኑና ጊሻናው፥ አማኔቲዳይሳኔ ቱማ። 10 ኑኒ ናጋራ አሲቦኮ ጊኮ ያሳ ዎርዳንቾ ኬሶስ፤ ኢያ ቃላይካ ኑናን ዴና።

2

**ኪሪስቶሲ ኑስ ጋናቴይሳ**

1 ታ ናይቶ፥ ናጋራ ሂንቴ አሶና ሜላ ታኒ ሃይሳ ሂንቴው ሃፋይስ። ሺን አኒካ ናጋራ አሲኮ አዋ ማታን ኑስ ጋናቴያ ጊሎይ፥ ዮሱስ ኪሪስቶሲ፥ ዴዔስ። 2 ኑ ናጋራይ ኪሪስቶሳ ባጋራ አቶ ጌቴቴስ። ኢ ኑ ናጋራ ሃላላስ ጊዶናሺን አሳ ኡባ ናጋራስ ያርሼቲስ።

3 ኑኒ ያሳ ኪታ ናጊኮ፥ ሲጴይ ባይናሺን፥ ቱማ ኑ ኢያ ኤሮስ።  
 4 አኒካ፥ «ታኒ ኢያ ኤራይስ» ያጊሼ፥ ኢያ ኪታ ናጎና ኢዲኮ ሄ ኡራይ ዎርዳንቾ፤ ቱማቴላ ኢያን ባዋ። 5 ሺን ኢያ ቃላስ ኑ ኪቴቲያባ ጊዲኮ ሄ ኡራይ ያሳ ሲቂያ ሲቆይ ፖሎ ጊዴስ። ኑኒ ያሳን ዴዔይሳስ ሄሲ ባው ቱማ ማርካ። 6 ታኒ፥ «የሳን ዴዓይስ» ጊያ አኒካ ኪሪስቶሲ ዴዒዳይሳዳ ዳናው ቤሴስ።

**አራሳ ኪታ**

7 ታ ሲቆ ኢሻቶ፥ ታኒ ሂንቴው ኮይሮፕ ዴዒያ ጋልዓ ኪታ ሃፋይሲፕ አቲን አራሳ ኪታ ሃፊኬ። ኢካ ሂንቴ ሲዒዳ ሄ ጋልዓ ኪታ። 8 ጊዲኮካ፥ ኪሪስቶሳኒኔ ሂንቴናን ቱማ ጊዲዲ ዴዒያ፥ አራሳ ኪታ ሃፋይስ። ጳማይ ኪቺን፥ ሃዒ ቱማ ፖያይ ፖዔስ።

9 «ፖፖን ዴዓይስ» ጊሼ ባ ኢሻ ኢዲያ አኒካ፣ ሃዒካ ጳማን ዴዔስ። 10 ባ ኢሻ ዶሲያ አኒካ ፖፖን ዴዔስ። ሄ ኡራን ሃራ አሲ ጳቢያባይ ባዋ። 11 ሺን ባ ኢሻ ኢዲያ አኒካ ጳማን ዴዔስ፤ ጳማን ሃሙቴስ። ጳማይ ኢያ አይፊያ ቆቂሲዳ ጊሾ አው ቢያኮ ኤሬና።

12 ታ ናይቶ፣ ኪሪስቶሳ ሱንሳ ባጋራ ሂንቴ ናጋራይ አቶ ጌቴቲዳ ጊሾ ታኒ ሂንቴው ዓፋይስ። 13 አዋቶ፣ ኮይሮፔ ዴዒያ፣ ኢያ ሂንቴ ኤሪዳ ጊሾ ሂንቴው ዓፋይስ። ያላጋቶ፣ ዓላሂያ ሂንቴ ያኒዳ ጊሾ ሂንቴው ዓፋይስ። 14 ጉሳ ናይቶ፣ ያሳ ሂንቴ ኤሪዳ ጊሾ ሂንቴው ዓፋይስ። አዋቶ፣ ኮይሮፔ ዴዒያ ኢያ ሂንቴ ኤሪዳ ጊሾ ሂንቴው ዓፋይስ። ያላጋቶ፣ ሂንቴ ሚና ጊዲያ ጊሾ ያሳ ቃላይ ሂንቴናን ዴዒያ ጊሾኒ ዓላሂያ ሂንቴ ያኒዳ ጊሾ ሂንቴው ዓፋይስ።

15 አላሜ ዎይኮ አላሜን ዴዒያባ ዶሶፒቴ። አላሚያ ዶሲያ አኒካ ያሳ ዶሴና። 16 አላሜን ዴዒያ ኡባባይ፣ አሾ አሞቴሴ፣ አይፊን ቤዒዲ አሞቴያባይኔ ሚሼን ጩቁቴሴ አላሜባፔ አቲን ያሳፊ ጊዴና። 17 አላሜይኔ አላሜን አሲ አሞቴያ ኡባይ አዳና፣ ሺን ያሳ ሼኒያ ፖሊያ አኒካ ሜሪናው ዳና።

**ኪሪስቶሳራ ኤቁቲያ ሞርኪያ**

18 ታ ናይቶ፣ ዎዲያ ወርሴሳይ ማታቲስ። ኪሪስቶሳ ሞርኪይ ሲንሳፊ ያናይሳ ሂንቴ ሲዒዳይሳዳ ሃሪ አቶሺን፣ ሃዒካ ኢያ ሞርኪቲ ዳሮቲ ዴንዲዶሶና። ሄሳ ጊሾ፣ ዎዲያ ወርሴሳይ ማታቲዳይሳ ኑኒ ሄሳን ኤሮስ። 19 ሄ ሞርኪቲ ኑ ባጋ ጊዶና ጊሾ ኑ ጊዶፊ ኬዬዶሶና። ኤንቲ ኑ ባጋ ጊዲያኮ ኑ ጊዶን ዴዓና፣ ሺን ኤንታፊ አኒካ ኑ ባጋ ጊዶናይሲ ኤሬታና ሜላ ኑ ጊዶፊ ኬዬዶሶና።

20 ሺን ኪሪስቶሲ ሂንቴ ቦላ ጌሻ አያና ጉሲስ፤ ቃሲ ሂንቴ ኡባይ ቱማ ኤሬታ። 21 ቱማ ሂንቴ ኤሪያ ጊሾኒ ቱማን አይቢ ዎርዶይ ባይናይሳ ሂንቴ ኤሪያ ጊሾ ታኒ ሂንቴው ዓፋይሲፔ አቲን ቱማ ሂንቴ ኤሮና ጊሾ ጊዴና።

22 ዬሱሲ፣ ያሳይ ዶሪዳይሳ ጊዴና ጊዲ ካዲያ አሳፔ ሃሪ ዎርዳንቾይ አኔ? ሄሳ ሜላ አሲ ኪሪስቶሳ ሞርኪ። ኢ ናዓ ካዲኮ አዋካ ካዴስ። 23 ናዓ ካዲያ አዴስካ አዋይ ባዋ፤ ቃሲ ናዓስ ማርካቲያ አዴስካ አዋይ ዴዔስ።

24 ሄሳ ጊሾ፣ ኮይሮ ሂንቴ ሲዒዳ ቃላ ሂንቴ ዎዛናን ሚንሲዲ ናጊቴ። ኮይሮ ሲዒዳይሳ ሂንቴ ናጊኮ ሂንቴው ናዓራኔ አዋራ ኢሲፊቴሴ ዳና። 25 ናዓይ ኑስ ሜሪና ዴዑዋ ኢማና ጊዲ ቃላ ጌሲስ።

26 ሂንቴና ባሌሲያ አሳ ጊሾ ታኒ ሃይሳ ሂንቴው ዓፋስ። 27 ሺን ኪሪስቶሲ ሂንቴ ቦላ ባ ጌሻ አያና ጉሲስ። ጌሻ አያናይ ሂንቴናን

ዴዲያ ጊሾ አኒካ ሂንቴና ታማርሶ ኮሼና። ኢያ ጊሻ አያናይ ሂንቴና ቱማ ታማርሴሲፔ አቲን ምርዶ ጊዴና። ጊሻ አያናይ ሂንቴና ታማርሲዳይሳዳ ኪሪስቶሳን ዴዲቴ።

28 ሂዛ፣ ታ ናይቶ፣ ኢ ቆንጨያ ምዴ ኑኒ ያሺ ባይናኔ ኢያ ዩሳ ጋላስ ኢያ ሲንሳን ኑ ዩላን ቆሴቶና ሜላ ኢያን ዴዲቴ።

29 ኪሪስቶሲ ዪሎ ጊዴይሳ ሂንቴ ኤሪኮ ዪሎ አሲያ ኡባይ ዩሳ ናዓ ጊዴይሳ ኤሪቴ።

### 3

#### ዩሳ ናይታ

1 ኑኒ ዩሳ ናይታ ጌቴቲዲ ዪጌታና ሜላ ዩሳይ ኑና አይ ሜላ ዶሲዳኮ ቤዲቴ። ኑኒ ቱማካ ዩሳ ናይታ። ሃ አላሜይ ዩሳ ኤርና ጊሾ ኑናካ ኤሬና። 2 ታ ሲቆ ኢሻቶ፣ ሃዲ ኑኒ ዩሳ ናይታ፤ ኑኒ አይ ሃናኒኮ ቡሮ ኤሬቲቤና። ሺን ኪሪስቶሲ ቆንጨያ ምዴ ኑኒ ኢያ ዳናናይሳ ኤርስ። ኢ ቱማ ዴዲይሳ ኑኒ ቤዓና። 3 ኪሪስቶሳ ቤዓና ጊዲ ኡፋይሳን ናጊያ አኒካ፣ ኪሪስቶሲ ጊሺ ጊዲዳይሳዳ ባና ጊሼስ።

4 ናጋሪ ሂጌ ሜንሶ ጊዲያ ጊሾ ናጋራ አሲያ ኡባይ ዩሳ ሂጌ ሜንሴስ። 5 ኪሪስቶሲ አሳ ናጋራ ዳይሳናው ቆንጨዳይሳ ሂንቴ ኤሬታ፤ ኢያን ናጋሪ ባዋ። 6 ኪሪስቶሳን ዴዲያ አኒካ ናጋራን ዴና። ቃሲ ናጋራን ዴዲያ አኒካ ኢያ ቤዒቤና ምይኮ ኤሪቤና።

7 ታ ናይቶ፣ ሂንቴና አኒካ ባሌሶፎ። ኪሪስቶሲ ዪሎ ጊዲዳይሳዳ ዪሎ አሲያ አኒካ ዪሎ። 8 ዓላሄይ ኮይሮፔ ናጋራ አሲዳ ጊሾ ናጋራ ኡባ ምዴ አሲያ አኒካ ዓላሄ ዳቦ። ሄሳ ጊሾ፣ ዩሳ ናዓይ ዓላሄ አሶ ዳይሳናው ቆንጨስ። 9 ዩሳ ናዓ ጊዲያ አኒካ ዩሳ አያናይ ኢያን ዴዲያ ጊሾ ኢ ኡባ ምዴ ናጋራን ዴና። ዩሳይ ኢያ አዋ ጊዲያ ጊሾ ናጋራን ዴና። 10 ዩሳ ናይታ ጊዶኒኔ ዓላሄ ናይታ ጊዶን ዴዲያ ዱማቴሳይ ሄሳን ኤሬቴስ፤ ዪሎ አሶና አሲ ምይኮ ባ ኢሻ ዶሶና አሲ ዩሳ ናዓ ጊዴና።

#### ኢሶይ ኢሱዋ ዶሲቴ

11 ኮይሮፔ ሂንቴ ሲዲዳ ኪታይ፣ «ኢሶይ ኢሱዋ ዶሳናው ቤሴስ» ያጊያ ኪታ። 12 ኑኒ ቃዔላ ሜላ ጊዳናው ቤሴና። ቃዔሲ ዓላሄ ዳቦ ጊዲዲ ባ ኢሻ ምዲስ። ኢ ባ ኢሻ አይስ ምዲዴ? ኢያ አሶይ ኢታ ጊዲዳ ጊሾኔ ኢያ ኢሻ አሶይ ሎዎ ጊዲዳ ጊሾ ምዲስ።

---

3:1 ዮሃ 1:12      3:5 ዮሃ 1:29      3:11 ዮሃ 13:34      3:12 ሜዴ 4:8

13 ታ ኢሻቶ፥ ሃ አላሚያ አሳይ ሂንቴና ኢዊኮ ማላሌቶሬቴ።  
 14 ኑኒ ኑ ኢሻታ ሲቂያ ጊሾ ሃይቆፔ ዴያ ፒኒዳይሳ ኤሮስ።  
 ባ ኢሻ ዶሶና ኦኒካ ሃይቆ ኩያን ዴዔስ። 15 ባ ኢሻ ኢዊያ  
 ኦኒካ ሼምፖ ዎዴስ። ቃሲ ሼምፖ ዎዴያ ኦዴስካ ሜሪና ዴያይ  
 ባይናይሳ ሂንቴ ኤሬታ። 16 ኪሪስቶሲ ባ ሼምፑዋ ኑ ጊሾ ኦሲ  
 ኢሚዳይሳን ሲቆይ አይቤኮ ኑኒ ኤሪዳ። ኑካ ኑ ኢሻታ ጊሾ  
 ኑ ሼምፑዋ አሲዲ ኢማናው ቤሴስ። 17 ሺን ዱሬ ጊዲዳ ኦኒካ  
 ሜቶታንቸዋ ቤዲሼ፥ ኢያው ቃዴቶና ኢዊኮ ባ ዎዛናን ያሳ ሲቆይ  
 ዴዔስ ጋናው ዋኒዲ ዳንዳዲ? 18 ታ ናይቶ፥ ኑኒ ኦሶኒኔ ቱማቴሳን  
 ኑ ሲቁዋ ቆንጨሳናው ቤሴስ፤ አቲን ጮ አዳ ዓላላን ዎይኮ ዶና  
 ዓላላን ሲቁታናው ቤሴና።

**ያሳን ዴዲያ አማኔቴሳ**

19 ኑኒ ኢሶይ ኢሱዋ ሲቂኮ፥ ኑ ቱማ ባጋ ጊዴይሳ ኤሮስ፤  
 ሄሳስ ያሳ ሲንሳን ዮላቶኮ። 20 ኑ ዎዛናይ ኑ ቦላ ፒርዲያ ባ ጊዲኮ፥  
 ያሳይ ኑ ዎዛና፤ ጊታ ጊዴይሳ ኤሮስ፤ ኢ ኡባባ ኤሬስ።  
 21 ታ ሲቆ ኢሻቶ፥ ኑ ዎዛናይ ኑ ቦላ ፒርዶና ባ ጊዲኮ  
 ኑኒ ያሳ ሲንሳን ያዮኮ። 22 ኑኒ ኢያ ኪታ ናጊያ ጊሾኒ ኢያ  
 ኡፋይሲያ ባ ኦሲያ ጊሾ ዎሲያ ኡባ ኢያ፤ ኤኮስ። 23 ኪሪስቶሲ  
 ኑና ኪቲዳይሳዳ ያሳ ናዓ ዮሱስ ኪሪስቶሳ ሱንሳን አማናናዳኔ  
 ኢሶይ ኢሱዋ ሲቃናዳ ያሳይ ኑና ኪቲስ። 24 ያሳ ኪታ ናጊያ  
 ኦኒካ ያሳን ዴዔስ፤ ያሳይካ ኢያን ዴዔስ። ያሳይ ኑስ ኢሚዳ ጊሻ  
 አያና ባጋሬ ኢ ኑናን ዴዔይሳ ኤሮስ።

4

**አያናታ ሻኪ ኤሪቴ**

1 ታ ሲቆ ኢሻቶ፥ አያናታ ኡባ አማና፤ ሺን ኤንቲ ያሳፌ  
 ዩዳኮ ፓጨ ቤዲቴ። አይስ ጊኮ፥ ዳሮ ዎርዶ ናቤቲ አላሜን  
 ዴንዲዶሶና። 2 ያሳ አያና ጊዴይሳ ሂንቴ ሃይሳን ኤራና፤ «ዮሱስ  
 ኪሪስቶሲ አሴ ጊዲዲ ዩዳይሳ ማርካታይስ» ጊያ አያና ኡባይ  
 ያሳፌ ዮስ። 3 ኪሪስቶሲ አሴ ጊዲዲ ዩዳይሳ አማናይስ ጎና አያና  
 ኡባይ ያሳፌ ጊዴና። ሄሲ ኪሪስቶሳ ኢዊያ አያና። ሂንቴ ሄ  
 አያናይ ያናይሳ ካሴ ሲዲዴታ፤ ኢ ሃሪ አቶሺን ሃዲካ አላሜን  
 ዴዔስ።  
 4 ታ ናይቶ፥ ሂንቴ ያሳሳ። ሂንቴ ጊዶን ዴዲያ ጊሻ አያናይ  
 አላሜን ዴዲያ አያና፤ ዳሮ ዎልቃማ ጊዲያ ጊሾ ዎርዳንቾ ናቤታ  
 ሂንቴ ያኒዴታ። 5 ኤንቲ ሃ አላሚያ አሴ ጊዲያ ጊሾ ሃ አላሚያ ባ

3:14 ዮሃ 5:24 3:23 ዮሃ 13:34፤ 15:12፤ 17

አዶሶና፤ ሃ አላሚያ አሳይ ኤንታ አዳ ሲሆሶና። 6 ኑኒ ያሳፌ ዩሌቲዳ፤ ያሳ ኤሪያ አኒካ ኑና ሲዔስ። ያሳ ኤሮና አኒካ ኑና ሲዔና። ኑኒ ቱማ አያናኔ ዎርዶ አያና ሄሳን ሻኮስ።

**ያሳይ ሲቆ**

7 ታ ሲቆ ኢሻቶ፥ ሲቆይ ያሳፌ ያ ጊሾ አኔ ኢሶይ ኢሱዋራ ሲቆቶስ። ሲቂያ አኒካ ያሳ ናዓ፤ ኢ ያሳ ኤሬስ። 8 ያሳይ ሲቆ ጊዲያ ጊሾ ሲቆና አኒካ ያሳ ኤሬና። 9 ኑኒ ኪሪስቶሳ ባጋራ ዴዑዋ ዴማና ሜላ ያሳይ ባ ኢሲ ናዓ ሃ አላሚያ ኪቲስ። ያሳይ ኑና ባ ሲቆዋ ሄሳን ቤሲስ። 10 ቱማ ሲቆ ጉሳይ ሃይሳ፡ ኑኒ ያሳ ሲቂዳ ጊሾ ጊዶናሺን ያሳይ ኑና ሲቂዳ ጊሾኔ ኑ ናጋራፔ ኑና ማራናው ባ ናዓ ኪቲዳ ጊሾሳ።

11 ታ ሲቆ ኢሻቶ፥ ያሳይ ኑና ሃይሳዳ ሲቂኮ፥ ኑካ ኢሶይ ኢሱዋ ሲቃናው ቤሲስ። 12 ያሳ ቤዒዳይ አኒካ ባዋ። ኑኒ ኢሶይ ኢሱዋ ሲቂኮ ያሳይ ኑናን ዴዔስ፤ ኢያ ሲቆይካ ኑናን ፖሎ ጊዴስ።

13 ያሳይ ባ ጊሻ አያና ኑስ ኢሚዳ ጊሾ ኑኒ ያሳን ዴዔይሳኔ ኢካ ኑናን ዴዔይሳ ኤሮስ። 14 አዋይ ባ ናዓ፥ ሃ አላሚያ አሼይሳ ጊዳና ሜላ ኪቲዳይሳ ኑኒ ቤዒዲ ማርካቶስ። 15 ዩሱሲ ያሳ ናዓ ጊዴይሳ ማርካቲያ አዴንካ ያሳይ ዴዔስ፤ ኢካ ያሳን ዴዔስ። 16 ያሳይ ኑና ሲቆይሳ ኑኒ ኤሮሲኔ አማናስ።

ያሳይ ሲቆ፥ ሲቆን ዴዒያ አኒካ ያሳን ዴዔስ፤ ያሳይካ ኢያን ዴዔስ። 17 ኑ ዴያይ ሃ አላሚያን ኪሪስቶሲ ዴዒዳይሳ ሜላ ጊዲያ ጊሾ ፐርዳ ጋላስ ያዮና ኢያ ሲንሴ ሺቃናው ኢያ ሲቆይ ኑናን ፖሎ ጊዴስ። 18 ሲቆን ያሺ ባዋ፥ ቱማ ሲቆይ ያሺ ኬሲ ሆሌስ። ያሺኔ ፐርዲ ኢሲፌ ቢያ ጊሾ ያያ ኡራ ሲቆይ ፖሎ ጊዴና።

19 ያሳይ ኮይሮ ኑና ሲቂዳ ጊሾ ኑ ሲቆስ። 20 አኒካ፥ «ያሳ ሲቃይስ» ጊሼ ባ ኢሻ ኢዲኮ፥ ኢ ዎርዳንቾ፥ አይስ ጊኮ፥ ቤዒያ ባ ኢሻ ሲቆና አኒካ ቤዒቦና ያሳ ሲቃናው ዋኒዲ ዳንዳዒ? 21 ኪሪስቶሲ ኑስ ኢሚዳ ኪታይ ሃይሳ፤ «ያሳ ሲቂያ አኒካ ባ ኢሻ ሲቃናው ቤሲስ» ያጌይሳ።

5

**አላሚያ ያና**

1 ዩሱሳ፥ ኢ ኪሪስቶሳ ያጊዲ፥ አማኒያ አኒካ ያሳ ናዓ። አዋ ሲቂያ አኒካ ኢያ ናዓካ ሲቆስ። 2 ኑኒ ያሳ ሲቂያ ጊሾኔ ኢያ ኪታ ናጊያ ጊሾ ያሳ ናይታ ሲቆይሳ ኤሮስ። 3 ኑኒ ያሳ ሲቂኮ፥ ኢያ ኪታታ ናንስ። ኢያ ኪታቲ ዴዎ ጊዶኮና። 4 አይስ ጊኮ፥ ያሳ

4:12 ዮሃ 1:18      5:3 ዮሃ 14:15

ናዓ ጊዲያ አኒካ ሃ አላሚያ ያናናው ዳንዳዔስ። ኑኒ ሃ አላሚያ ያናናይ ኑ አማኑዋና። <sup>5</sup> አላሚያ ያናናው ዳንዳዔይ አኔ? ዮሱሲ ያሳ ናዓ ጊዴይሳ አማኒያ አሳ ዓላሊ ያናና።

**ኪሪስቶሳባ ማርካቴይሳ**

<sup>6</sup> ዮሱስ ኪሪስቶሲ ሃሳ ሂንቃቲያራኔ ባ ሃይቁአዋ ሱሳራ ዩስ። ኢ፣ ሃሳራኔ ሱሳራ ዩሲፔ አቲን ሃሳ ዓላላራ ዩቤና። ጌሻ አያናይ ቱማ ጊዲያ ጊሾ ሄሲ ቱማ ጊዴይሳ ማርካቴስ። <sup>7</sup> ሄኹ ማርካቴ ዴዎሶና። <sup>8</sup> ሄሳቲ፣ ጌሻ አያና፣ ሃሳኔ ሱሳ። ሃ ሄኸታ ማርካቴሳይ ኢሲኖ። <sup>9</sup> ኑ አሲ ማርካቴይሳ አማኖስ። ሺን ያሳ ማርካቴሳይ አሳይሳፌ ዳሮ አዴስ። ያሳይ ባ ናዓስ ማርካቴዳ ማርካቴሳይ ሃይሳ። <sup>10</sup> ያሳ ናዓ አማኒያ ኡራ ዎዛናን ሃ ማርካቴሳይ ዴዔስ። ያሳ አማኖና አኒካ ያሳይ ባ ናዓስ ማርካቴዳ ማርካቴሳ አማኒሪና ጊሾ ያሳ ዎርዳንቾ አሴስ።

<sup>11</sup> ሂዛ፣ ማርካቴሳይ ሃይሳ፤ ያሳይ ኑስ ሜሪና ዴዎ ኢሚስ፤ ሄ ዴዎይካ ኢያ ናዓን ዴዔስ ያጌይሳ። <sup>12</sup> ያሳ ናዓይ ዴዒያ አዴስካ ዴዎይ ዴዔስ። ያሳ ናዓይ ባይና አዴስካ ዴዎይ ባዎ።

**ሜሪና ዴዎ**

<sup>13</sup> ያሳ ናዓን አማኒያ ሂንቱው ሜሪና ዴዎይ ዴዔይሳ ሂንቱ ኤራና ሜላ ሃይሳ ሂንቱው ዓፋስ። <sup>14</sup> ያሳ ሸኒያዳ አይቢባካ ኢያ ዎሲኮ፣ ኢ ሲዔይሳ ኑኒ ኤሪያ ጊሾ ኢያን አማኔቶስ። <sup>15</sup> ኑኒ ዎሲያ ኡባ ኢ ሲዔይሳ ኤሪኮ፣ ኑኒ ዎሲያባ ኢ ኢማናይሳ ኤሮስ።

<sup>16</sup> አኒካ ባ ኢሻይ ሃይቆ ቤሶና ናጋራ አሲሺን ቤዒኮ፣ ያሳ ኢያው ዎሳናው ቤሴስ። ሃይቆ ቤሶና ናጋራ አሲዳይሳታስ ያሳይ ዴዎ ኢማና። ሃይቆ ቤሲያ ናጋሪ ዴዔስ። ታኒ ሂንቱና ሄሳስ ያሳ ዎሲቱ ጊኬ። <sup>17</sup> ኢታ አሶ ኡባይ ናጋራ፣ ሺን ሃይቆ ቤሶና ናጋሪ ዴዔስ።

<sup>18</sup> ያሳ ናዓይ ኢያ ናጊያ ጊሾ ያሳ ናዓ ጊዲዳ አኒካ ናጋራን ኡባ ዎዴ ዴዎናይሳ ኑኒ ኤሮስ። ዓላሄይ ኢያ ቆሃናው ዳንዳዔና። <sup>19</sup> ኑኒ ያሳሳ ጊዴይሳኔ ሃ ኩሜሳ አሳሜይ ዓላሄን ሃራቴይሳ ኤሮስ።

<sup>20</sup> ኑኒ ቱማ ያሳ ኤራናዳ ያሳ ናዓይ ዩዳይሳኔ ኑስ አኬካ ኢሚዳይሳ ኤሮስ። ኑኒ ኢያ ናዓ፣ ዮሱስ ኪሪስቶሳ ባጋራ ቱማ ያሳን ዴዎስ። ዮሱሲ ቱማ ያሳኔ ሜሪና ዴዎው።

<sup>21</sup> ታ ናይቶ፣ ኤቃታፔ ሂንቱ ሃኪቱ።

አራሳ ጫቁዋ ጎፋሉ  
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---



PDF generated using Haiola and XeLaTeX on 12 Mar 2019 from source files dated 12  
Mar 2019  
c35d6c73-3843-5482-b53e-7559d35deee5